



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : f Tir Yimyim

tir_yimyim

tir yimyim

TAPAK 3

**Adiala Jail nung Imran Khan
temang tamajungba akumer**

**Mamata Banerjee kijai BJP
den rarar: Akhilesh Yadav**



VOL. XXIII ISSUE NO. 105 (ADOK 105) DIMAPUR RASEMNÜ (WEDNESDAY) AENJETI (JANUARY) 28, 2026 ₹ 5.00

NST-i departmental inquiry asütsü

Dimapur, January 27, 2026 (TYO): Nagaland State Transport (NST) recruitment drive nung shimtetba candidate tem dang senotsü meshiba atema departmental inquiry ka tenzükogo.

General manager, NST indang office ajanga candidate tem dang sen meshi ta social aser print media nung sangdongba nguogo. NST-i ketdangsür shinga nem-a candidate dang paperwork atema sen meshitsü temelaba agüja mali, ta Addl Secretary to the Government of Nagaland Athrila S Sangtam, NCS-i sangdong ka nung ashi.

Iba ken o atema department-i departmental inquiry committee

ka tenteta bushisüngdang südaksütsü ta laisa ashi.

Transport Advisor-ia department dang inquiry committee ka tentetsü tetuyuba agütsüogo aser parnoki bushitetba nung ajemdaker nüngdakba disciplinary action agütsü ta Athrila-isa ashi.

December 12, 2025 nü Departmental Recruitment Board (DRB) maparen shimtetba candidate tem dang Dimapur nung NST general manager office-i original documents bener arutsü aser parnok nisung shiai paperwork atema Rs 10,000 bener arutsü tetuyuba agütsü ta ken o ka adoka lir.

ANATG, 2015 batch-i Jan 30 züingzüktsür

Dimapur, January 27, 2026 (TYO): January 30, 2026 tashi nung sorkari parnok mapa regularise mesütsüra state ajungalen lungkak aittsü ta All Nagaland Adhoc Teachers' Group (ANATG), 2015 batch-i Mongulbarnü metetdaksüogo.

January 7 nü Commissioner and Secretary, School Education & SCERT dangi shidi züluba meyipa reprangshitsü atema ANATG core committee rongdak senden ka amenba sülen iba osang metetdaksü.

ANATG core committee-isa district 17 nung unit 14 nung züingsem ajak lungkak aitba nung shilem agütsü tuyuba den shilem magirtem dang senchi achitsü akok ta shisemogo.

Sorkari parnoki akhangba ama meinyakra lungkak aittsü atema parnokisa district units akangshitsü bangjemtepogo.

ANATG kübok adhoc tesayur 1,166 lir aser parnok ya 1994 aser December 2012 tsüingda shimokertem lir. Parnok rongnung primary, graduate & language teachers, Hindi teachers, carpentry instructors aser art teachers densema lir.

School Education department-

i 2017 nung regularisation drive sangdong agütsüba ama parnoki written tests, interviews aser document verification inyakogo ta ANATG-i ashir.

Züingsemtemi suitability tests nung takok nguaka regularize masü aser 2018 nung mener lungkak aitba sülen Sixth Revision of Pay ang agütsü.

Ano, 2022 lumia lungkak aitba ajanga High Powered Committee (HPC) agreement ka nung sign sütep aser iba nung sorkari anogo 15 tsüingda committee ka tentetsü nangzük.

Iba HPC ajanga June 2023 tashi nung parnoki bushitetba osang agütsütsü aser December 2023 nung ken o angatetteptsü ta sorkari ashi saka HPC agreement nung lateta ayuba onüktem ama meinyak. Ano, 2024 nung one-time regularisation policy kübok tanga department nungbo adhoc employees regularize süaka ANATG züingsemtembo regularize masü ta parnoki ashi.

January 30, 2026 ya regularization atema tatembangba anogo asütsü aser sorkari iba mapa meinyakra kanga sashia lungkak aittsü ta ANATG core committee-isa ashi.

APFRA ajanga tamangba yimsü ajak kümzüktsü

Itanagar, January 27, 2026 (Agencies): State sorkari Arunachal Pradesh Freedom of Religion Act (APFRA), 1978 mapa tenzüktsü atema inyakyim tasentem latettsü ta Home Minister & Department of Indigenous Affairs Minister Mama Natung-i ashi.

APFRA ya state nung aliba tamangba yimsü ajak kümzüka ayutsü asoshi lir aser iba ya tamangba yimsü ka mesüra lokti ka anema masü. Iba Act ajanga tashiyim agi tamangba yimsü melendaksüba noktangtsü ta Minister Natung-isa ashi.

Iba ozüing ya timi aser tashishitsü melii benshitsü atema

rules latettsü. Iba Act ya lokti nung putepa alitsü aser Arunachal Pradesh nung lisopur tamangba yimsü aser sobaliba inyaksangshi kümzüka ayütsü atema lir ta paisa ashi.

"Sorkari APFRA ya tamangba yimsü kecha anema masü saka tamangba yimsü tim mesüi melenba noktangtsü atema ta angateter. Iba Act ajanga tamangba yimsü ajak pusema nungittsü aser tamangba ya kija kati mulungba aser angatetba ama yutsütsü" ta Home Minister Natung-isa metetdaksü.

Arunachal Pradesh Freedom of Religion Act ya 1978 nung yanglu saka detailed rules maliba ajanga mapa küma meinyakteti arur.

Benjung ajanga telongjem aser teputep adokdaksür: CL John



Dimapur, January 27, 2026 (TYO): Benjungbentsü amungba ajanga nübortem tsüingda telongjem aser teputep adokdaksür ta Environment, Forest & Climate Change & Village Guard Minister, C.L. John-i ashi.

January 27, 2026 nü Chümoukedima kübok Government High School Playground, Dhansiripar nung 18 buba Bishu Mini Hornbill Tribal Festival 2026 tenzükba sentong nung pai iba o jembi.

Bishu benjung ya Dimasa nunger alu marudang amungba benjung ka lir.

"Bishu aser Hornbill festival amala benjungtem ajanga Nagaland nung kin balala tsüingda telongjem, putepshiba aser külem maittsü lemsateper" ta C. L. John-i ashi.

"Bishu benjung den pelatepba, kentenba, tsüingsangba aser chiyungtsü sendaktepa lir aser külen putepshitsü indang

maongka agütsür. Anungji nisung ajaki tatok agütsüteptsü, mangatettep agentsü aser külemi tejakleni aotsü ayongzüker" ta Minister John-i ashi.

Asenok rongnung kin aser telok telemsa ya agentsüla aser state rongsenketzüng nung renloka aotsü atema yimjung aser telongjem atema inyaksüla ta paisa ashi.

Hornbill Festival ya "telongjem indang benjung" lir aser iba ajanga Nagaland nung kin ajak sabang ka nung anidener. Iba benjung ajanga asenoki ola ka dang adoker aser ibala benjung ajanga kati ka akhümtsübuba, angatetba aser putepa alitsü tangatetba agütsür. Item benjung ajanga kintem rongnung mangatettep aliba agiener, ta John-isa metetdaksü.

Paisa lanurtem dang meranga inyaksü aser wadang balala nung tanishirtem akümtsü nükjidong ayutsü ayongzüker.

Iba sentong nung Chakroma Public Organisation President Zhato Kimho, Western Sumi Hoho President Vikato Achumi, Eastern Nagaland Peoples' Union Dimapur President Thamlong Phom, aser Kachari Tribe Council, Nagaland President C.K. Bill Mech nungeria o jembi.

Sentong nung KRPC Vice President Lemsan Hojai-i anir Bishu sarasadem, Dimasa Public Organisation, Nagaland president Ditush Naben-i tesentepertem pelaa agizük, Kachari Tribal Council Advisor S. K. Khemprai-i Bishu salem lemsatet aser DPON General Secretary Robert Khemprai-i anküp tepela o jembi.

Minister John-isa Dimasa yimtsüing 10 indang exhibition stalls lapoktsü.

Anogo ananü benjungmung ya Dimasa Public Organisation, Nagaland-i Nagaland Tourism Department den yaritepa ayongzüka amunger.

NSCN-K (Ang Mai)-i nisung khasetba tenüing agir NSCN-K (Yung Aung) züingsemtem dang metetdaksür

Dimapur, January 27, 2026 (Agencies): January 23, 2026 aonung 7:30 ako meta Mon District kübok Longphaoh yimtsüing nung NSCN-K (Yung Aung) züingsem Maj. Manwang Leipha khasetba atema Naga Army, NSCN-K (Ang Mai)-i tenüing agiogo.

"Onoki aiben yimjung aser longjemtsü atema meranga inyaka aru aser NSCN-K (YA) züingsemtem den prangpongtem tatemzükba kecha melii chiokaka NSCN-K (YA)-i kanga mejungi inyak. Parnoki Khammataing yimtsüing nung Naga Army amak aser idangji Pochury Region nungi Lieutenant Avi aser Konyak Region nungi Sergeant Peyao Konyak na khaset" ta MIP, NSCN-K (AM)-i sangdong ka nung ashi.

"Maj. Manwang Leipha-i iba tesem nung tashiyim mapatem inyaka aru aser pa dang NSCN-K anema inyaksangshiba anentsü aiben shiogo. Iba osang ya yimtsüing ketdangpurtem den-a lemsatet saka parnoki pa mazioktet" ta MIP-isa metetdaksü.

"Maj. Manwang Leipha-i NSCN-K anema maneni inyakba

aser Khammataing yimtsüing nung ozü sepaitem khasetba atema Naga Army special unit kati pa nem tasüba temerenshi agütsü" ta NSCN-K (AM)-isa ashi.

Parnokisa NSCN-K (Yung Aung) nung züingsemtem dang telok toktsür kidangi meyipa arutsü ayongzüko.

Tesüiba küm ana-asem tsüingda Naga Army-i NSCN-K (YA) züingsem aika apu saka yimjung, telongjem aser putepshitsü tangatetba nung odang chiokogo. Iba ya onok tashimait agi masü saka tapayutsü takümttem kümzüka ayutsü aser yimjung asoshi temulung lemteptsü mechi nung inyakba dang liasü ta NSCN-K (AM)-i ashi.

"Collective Leadership lenisüba kübok Naga Army dang aremzüksü, putepshitsü aser 'Nagaland for Christ' o 'Forgive and Forget' tangatetbatem kübok tajung inyaksü tetuyuba agüja liasü. Naga nungeri Naga nunger azü joko metokshitsü atema iba tetuyuba agütsü" ta Defence Secretary, GPRN Lieut. Col. Anglu-i sangdong ka nung ashi.

Ajisüaka, January 9 nü NSCN-K (YA)-i Khammataing yimtsüing amakba ajanga onok kümzüka ayutsü atema mapa inyaksüsa aküm. Iba nung ajemdaker Ministry of Defence Affairs, GPRN-i yimtsüing ajak aser talisa Yung Aung telok lidaksürtem dang Yung Aung nung züingsema aliba pei jabasojalatem dang iba telok toktsür kidangi meyipa arutsü tetuyuba agütsütsü metetdaksür ta Defence Secretary-i ashi.

Iba tetuyuba tashi mangartem dak tapet mapa inyaksü. Tang onoki pua alirtem dak nüngdakba 'military action' agütsü. Ajisüaka pei sasa mulungteta bendanga agütsürtembo pelashishia agizüktsü aser tagütsütsü tim agütsütsü ta parnokisa ashi.

NSCN/GPRN law & order inyakba mapang Civil Society Organizations mesüra kija shinga tiyongtsü aittsü makok. Tiyongtsüi aiter shinga magizüktsü aser iba mapa inyakertemi tebilemtsü khuret abentsü ta NSCN-K (Ang Mai)-isa metetdaksüogo.

Minority Affairs department-i Wokha nung awareness sentong ayongzük



Directorate of Minority Affairs ajanga Wokha nung awareness sentong ka ayongzükba nung Joint Director, Minority Affairs Department, Andrew C. Imti-i jembidang tangokba noksa nung angur.

Dimapur, Aenjeti/January 27 (TYO): Directorate of Minority Affairs, Nagaland ajanga Deputy Commissioner, Wokha indang Conference Hall nung January 27, 2026 nü awareness aser sensitization sentong ka ayongzükba liasü.

National aser state level nung minority pur atema constitution nung temelaba agüja aliba aser terenlok atema scheme balala agütsüba indang stakeholders nem metedaktsütsü nükjindong nung iba sentong ya ayongzükba liasü.

Sentong tenzükba ADC Wokha, Renbomo Ezung-i pela agizükba o jembia aser Joint Director, Minority Affairs, Andrew C. Imti-i iba sentong ayongzükba nükjindong lemsatepba mapang sorkar indang scheme balala amshia minority nüburtem temaba jenjangi ajungketba indang rateta ashi.

Minority Affairs Department nungi ketdangsür temi

PowerPoint presentations balala agütsü.

Programme Assistant, Khriezotulie-i National Minorities Development and Finance Corporation (NMDFC) kübok Micro-Credit Schemes indang onük nung jembidang iba scheme yagi minority kin nungi rongsenketzüng tsütsü tashi mait alirtem pei sasa poksünga lidaktsütsü atema loans jenjang tajemba nung agütsüba indang ashi.

LDA, Lily Tungoe-i Minority Scholarship Scheme indang onük nung jembia liasü, koba ajanga levels balala nung shisaluyimba mapang minority kaketshirtem yarir.

Project Officer, Shalo Khing-i Pradhan Mantri Jan Vikas Karyakram (PMJKV) indang kanga jangja rateta ashi, koba minority nisungtem aliba tesem nung socio-economic terenlok tajungba kumdaktsütsü mechi ki o jen aser community

assets yanglutsütsü nükjindong nung lir.

Assistant Project Officer, Thejavizo Rio-i PM VIKAS (Pradhan Mantri Vishwakarma Kaushal Samridhi) indang rateta ashi, koba ajanga minority nisungtem nem skill training, senotsü teyari aser market linkages tem agüja parnok takum nung temelenshi bener arutsür.

Iba sentong nung Project Officer, Shalo Khing menden liasü, kong Wokha district nung aliba sorkar department balala nungi tekolak tem den yimtsüng balala nungi council chairmen tem dena item scheme grassroots level nung mapa kuma inyaksü indang sensaksema liasü.

Iba sentong ya Wokha district nung Directorate of Minority Affairs ajanga mezüngbuba ayongzükba alitsü aser parnoki ano danga district tem nunga ayongzüktsü ta sangdong.

Friends On Wheels Motorcycle Club-i "Ride With Pride Vol. - V" ayongzük



Dimapur nung January 26, 2026 nü "Ride With Pride Vol. - V" ayongzükba sentong nung 9 Assam Rifles, Jalukie ketdangsürtem den Friends on Wheels Motorcycle Club züngsemtem külemi tangokba noksa nung angur.

Dimapur, Aenjeti/January 27 (TYO): Friends On Wheels Motorcycle Club Nagaland aser 9 Assam Rifles Jalukie lungjemer 77 buba Republic Day mapang January 26, 2026 nü "Ride With Pride Vol. - V" ayongzükba liasü.

Iba bike rally nungya tetsür densema bike riders 237-i shilem agia liasü.

Nagaland, Karbi Anglong aser West Bengal nung motorcycle clubs balala nungi züngsemtem adenshia iba sentong ya region nung motorcycle rally tulutiba rongnung ka kumdaktsü.

Iba rally nung Bharat Petroleum aser Xude ajanga

yari aser tongti tesemdang Brigadier Mayank Singh Janwal, DIG, HQ 6 Sector Assam Rifles den Kamal Bilala Jain, Nagaland State Treasurer, BJP aser Brand Ambassador, Friends On Wheels Motorcycle Club Nagaland nungertem dena liasü.

Tongtipang nisungtem ya Friends On Wheels Motorcycle Club Nagaland tir Abhijeet Bharadwaj-i agizük aser M Raja Paul aser Friends On Wheels züngsem temi tetushi agüja liasü.

Iba rally ya City Tower, Dimapur nung anepdang 7:20 ako nung Brigadier Mayank

Singh Janwal-i tenzüktsü aser 9 Assam Rifles, Jalukie nung tembang, kong Assam Rifles, NCC Cadets aser nüburtemi parnok agizükba liasü.

Yangji linük nisan salaba sülen Col. Mohit Bansal, 9 Assam Rifles ajanga tajungshi o jembia. Iba sülen Tug of War, Slow Bike Race, Traditional Games aser Fittest Rider competition amala ayongzükba takok angur nem sempet agüja liasü.

Ride With Pride Vol.-V ya Republic Day benjongba kisüng masü saka civilian, lanurtem aser Indian Armed Forces tsüngta tesendaktep akangshiba ka liasü.

Advisor H. Tovihoto Ayemi-i P. Mongchua asükhu lemsatep

Dimapur, Aenjeti/January 27 (TYO): Advisor H. Tovihoto Ayemi-i taoba mapang Nagaland Legislative Assembly nung züngsem (MLA) ka ama inyaksang P. Mongchua asükhu lemsatepa liasü, shiba January 26, 2026 nü asü.

NPP MLA Benei M. Lamthiu tebu aser taoba mapang MLA inuaka alisang P. Mongchua asüba osang angazüka kanga sasar, ta

Advisor Tovihoto-i sangdong ka nung ashi.

"Bendanga agütsür nübur tenzüker aser taoba mapang Nagaland indang lenir, Asür P. Mongchua-i tongmelang agi bendanga agütsür pa mapa inyaka liasü. Par jabaso Benei M. Lamthiu aser kinungertem den asükhu lemsateper."

Asür tanüla tesunep nung anisüngzükjangma, ta Advisor Tovihoto Ayemi-isa ashi.

DoTE-i Faculty Development Program ayongzük



Dimapur, Aenjeti/January 27 (TYO): Directorate of Technical Education, Kohima ajanga Directorate indang Conference Hall, Kohima nung January 22-23, 2026 anogotem Faculty Development Program ayongzükba liasü.

Iba senting nung nisung 93-i shilem agi aser shisalen sayur ya Prof. Dr. Khwaja M. Rafi, Director, Mewat Engineering College, HWB, Government of Haryana; Prof. Dr. Sukanta Kumar Naskar, Technical Education & Management National Institute of Technical Teachers' Training and Research, Kolkata; Dr. Sonam Palden, Principal, Advanced Technical Training Centre, Sikkim aser Zakie Rheicha, State Co-Ordinator for NeGD, MeiTY nungertem liasü.

Technical Sessions mapang 'ICT-Enabled Outcome-Based Pedagogy, NEP 2020 Curriculum & Employability, Quality Assurance, approaches

on learning experiential, learner-centric outcome-based. SMART objectives in education and training students to solve unknown and unstructured problems, use of emerging technologies, particularly AI tools, Hands-On session on Academic Bank of Credits (ABC) aser APAAR ID' amala onüktem nung sensaksema mapang agia liasü.

FDP nung Examination systems, Work culture & Ethics, Building trust among peers and Higher ups, Time and Conflict management, Strategic management and plan, Guidance to Faculties from experiences sessions tem agi.

Tatembang sentong nung Er. Vipulhou Lhoungu, Director, Technical Education ajanga shisalen sayur aser sentong nung adener ajunga dang pelaba lemsatep aser polytechnics nung technologies tasentem amshia aser sayutsü ayongzükba liasü.

Imnüksüngba takum otsü kakat "Shisa Jen" sayaogo



Dr. C. Furkumzuk-i züluba Imnüksüngba takum otsü kakat ("Shisa Jen"), January 27, 2026 nü Rev. Dr. L. Kari Longchar-i sayatsüba mapang tangokba noksa ka yangi angur.

Dimapur, Aenjeti/January 27 (TYO): "Shisa Jen" nüngja agütsür Asür Imnüksüngba takum otsü kakat ka Dimapur nung Rev. I. Bendangmeren Longkumer kidang January 27, 2026 nü sayaogo. Iba kakat ya Longkhum yim nungi Dr. C. Furkumzuk-i zülü aser Ao oshi nung lir.

Imnüksüngba (1909-1994) ya Longkum yimtsüng nungi liasü, aser pai Naga nunger puti otsü nung British nungeri yimsü

asüba, Second World War aser Naga movement tensa tamajungtiba mapang ajanga ali. Pai lokti aser nüburtem asoshi mapa tajung jenti inyaka liasü.

Iba kakat nungya pa takum otsü tongmelang agi shia lir.

Kakat ya taoba Executive Secretary, Ao Baptist Arogo Mungdang (ABAM) aser taoba Director, Peace Affairs for Nagaland Baptist Church Council (NBCC), Rev. Dr. L. Kari Longchar-i sayaja liasü.



Electoral rolls atema Special Intensive Revision (SIR) mapang nūburtem rongshiba anema Kolkata nung Mongolbarnū longkak aitba sentong ka ayongzūk agiba mapang tangokba noksa nung angur. Iba sentong ya civil rights teloktem aser opposition party pusemertemi ayongzūka agia liasū.

India aser EU na tenangzūktepba tulu ka yangluogo

New Delhi, Aenjeti/January 27 (Agencies): India aser European Union na tenangzūktepba tulu ka yangluogo aser iba ajanga nisung billion ana atema free trade zone ka yanglutsūogo, ta Ato Kilonser Narendra Modi aser European Commission tir Ursula von der Leyen nati ashi.

Mongolbarnū New Delhi semdangba mapang von der Leyen-i X ajanga, telok ana yagi tanū otsū tasen yanglur, ta ashi.

"Onoki tenangzūktepba ajak rongnung tetsūtiba tembanga yangluogo. Onoki nisung billion ana atema free trade zone ka yangluogo aser iba ajanga telok anaprongla ajangzūksū," ta laisa shisem.

Kasa mapang nung Modi-i ashiba agi, kum metsūshi sensaksem agi aruba sūlen tang iba tenangzūktepba ya yangluogo. Paisa, von der Leyen aser European Council tir Antonio Costa na den senden mamen tsūngda iba tenangzūktepba ajanga telok anaprongla kanga ajangzūksū ta ashi.

"Iba tenangzūktepba ajanga India nung nisung billion 1.4 aser EU nung nisung million aika nem maongka tajung bener arutsūtsū," ta pai ashi.

Iba tenangzūktepba yagi alima nung gross domestic product (GDP) shilem 24 shi ayimjemtsū, ta Modi-i ashiba den, iba ajanga India textiles, gems aser jewellery, aser shikūp agi yangluba osettem densema sector balala nung teyari tulu angutsū.

United States-i tariffs tali benokba aser China-i export azūkoker aliba mapang shishilembadak tasen lapoktsū atema Brussels aser New Delhi nati iba tenangzūktepba ya yangluogo.

Iba ajanga alima nung nūtsūngyongsūk timtiba aliba linūk India asoshi lenmang

lapokja EU linūk 27 den tenokdangba kecha makai sadem sadema shishilembatsū atema teyari agūtsūtsū.

EU-i India ya tarutsū atema tongtibang shishilembadak ka ta zūngshir aser kasa mapang nung New Delhi-i Europe ya technology aser sen entoktsū atema tongtibang source ka ta zūngshir.

Temzūng ozūng dak sendakba nung tinyaktsū maparen ajak tembanga inyakba sūlenang iba tenangzūktepba nung formally sign asūtsū, koba ita pongu nungi trok tsūngda agitsū imlar, ta ken o jangja aliba India nung ketdangsūr kati ashi. Ketdangsūr yagisa tenangzūktepba ya kum ka tsūngda benoka inyaktsū imlar, ta ashi.

EU-i ashiba agi, iba tenangzūktepba yangluba sūlen India dangi parnok indang export ya 2032 kum tashi nungbo anasū agi timba akūmtsū imlar.

Taoba kum ter tsūngda India aser EU na oset balala dak sendakba nung bilateral shishilemba shilem 90 shi agi renlokogo aser 2024 kum tashi nungbo euro billion 120 jungogo. Service dak sendakba nung shishilemba ya euro billion 60 jungogo, ta EU data ajanga sayuogo.

Tenangzūktepba kūbok India dangi export asūba EU indang osettem shilem 96.6 nung tariffs agintsū mesūra tajemba kumdaktsūtsū, ta EU ketdangsūrtemi ashi. Iba tenangzūktepba yangluba sūlen kum nung Europe indang oset nung duty agiba euro billion 4 kumzūksū, ta ketdangsūrtemisa metetdaksū.

Tariff magitsūba mesūra tera dang agitsū aliba osettem rongnung machinery, chemicals aser pharmaceutical densema lir.

Gari dak sendakba nung

tariff ya shiem 10 agi tajemba akūmtsū aser kum ka nung quota ji gari 250,000 asūtsū. Kasa mapang nung EU nung service agūtsūrtem financial aser maritime service dak sendakba nung India nung inyaktsū asoshi maongka angutsū, ta ketdangsūrtemi ashi. EU aircraft aser spacecraft dak sendakba nung oset ajak amai nungi tariff agintsū.

EU wine nung tariff shilem 20-30, spirits nung shilem 40 aser beer nung shilem 50 tajemba kumdaktsūtsū. Sūngiang juice aser processed chiyongtsūtem nungi tariff ajunga agintsū.

India aser EU na shishilembatsū atema sensaksem ya 2007 kum tenzūk, saka kum aika tejakdangi bener moteti aruogo, ajisūaka Russia-i 2022 kum Ukraine amak tenzūkba sūlen sensaksem tenzūkshi aser US tir Donald Trump-i tariff aika benok tenzūkba ajanga sensaksem kanga kara agiyonga ogo.

India aser EU natisa security aser defence partnership ka amenokba sangdongogo, koba EU-i Japan aser South Korea na den yangluba partnerships den mesūketeper.

Tongtibang military hardware dak sendakba nung India Russia dak metaloker aruba tajemba kumdaktsūtsū merangba mapang ka nung tang iba jenjang ya agiogo.

Brussels-i South American bloc Mercosur den tongtibang tenangzūktepba ka yangluba sūlen tang India aser EU na iba tenangzūktepba yangluogo. Taoba kum EU-i Indonesia, Mexico aser Switzerland den tenangzūktepba yangluogo aser iba mapang India-ia United Kingdom, New Zealand aser Oman den tenangzūktepba yanglua liasū.

Mamata Banerjee kijai BJP den rarar: Akhilesh Yadav

New Delhi, Aenjeti/January 27 (Agencies): Samajwadi Party (SP) lenir Akhilesh Yadav-i Mongolbarnū ashiba agi, Bharatiya Janata Party (BJP) anema raraba lenir chief minister Mamata Banerjee kija lir, shibai West Bengal nung special rules benokba atema BJP aser Election Commission of India (ECI) aija arudar.

"BJP den rara kar dang lira aji iba state (West Bengal) chief minister lir. BJP anema yamai nokdaksūla," ta Banerjee den ajurutebpa sūlen Yadav-i ashi.

Yadav-i ashiba agi, West Bengal nung electoral roll atema Special Intensive Revision (SIR) tenūng nung ECI aser BJP nati National Register of Citizens benokdar. "Parnoki nisung timba nem parnok democratic temeden amshidaktsūtsū melena nisung timba timba tenūng agindar," ta Yadav-i ashi, shibai Kolkata semdanga liasū.

Paisa, Bengal nung secular tashitem longjemer election

tokteptsū imlaba lemsatēp. "Secular tashitem shirnok asen linūk maitsū lir parnok longjemer raratsū ta temulung lema bilemer. BJP-i iba state ya Didi [Banerjee] lenisūba nung tangar dang nungi balaka ta amatokogo. Idaki aliba nūburtemi tesempatep dak masū saka temim dak tamang akar," ta pai ashi. "Parnoki Didi rongshir saka pa tanaben chief minister akūmtsū. Election nung BJP tamakok angutsū," ta paisa shisem.

Yadav-i ashiba agi, parnoki vote auyaba indang jembir, saka Banerjee-i data auyartem nokdangogo. "Ni la tasū aitba tushir. ED [Enforcement Directorate], CBI [Central Bureau of Investigation], income tax [department] BJP atema inyaker ta ajaki meteta lir," ta Yadav-i, January 8 nū ED-i Trinamool Congress indang election strategist raid asūba mapang Banerjee-i kuli kakē kar aser laptop ka bener aoba indang jembia liasū.



**पावरग्रिड
POWERGRID**

OSANG AGÜTSÜR

North Eastern tesem nung ISTS And State Utility Communication Network atema State-of-the-Art Unified Centralized Network Management System U-NMS amenoktsū asoshi 2024-29 tariff block atema transmission tariff determination atem aser 2019-24 atema Transmission tariff bener arutsū atema temepishiba.

1. Tema len shisema aliba Transmission system atema beneficiary temji: (a) Assam Power Distribution Company Limited (b) Meghalaya Power Distribution Company Limited (c) Government of Arunachal Pradesh (d) Power and Electricity Department, Mizoram (f) Electricity Dept. of Puducherry (g) DOP, Nagaland (h) TSECL.

3. Tariff details: a) 2019-24 block		Rs. in lakhs				
Asset detail	DOCO	Completion Cost as on 31.03.2024	2019-20	2020-21	2021-22	2022-23
Asset-1	05.12.2023	6541.31	Revised AFC based on truing up	--	--	581.09

b) 2024-29 Block		Rs in lakhs				
Petition	Asset detail	Completion Cost as on 31.03.2029	2024-25	2025-26	2026-27	2027-28
Petition-1	Asset-1	8118.60	AFC	1814.69	1942.65	1985.69

4. Tariff determination atema application copy ka applicant indang website www.powergrid.in nung enokja lir.

5. Petition nung tariff determination atema benokba nung tebilemba mesūra tashishiba kar dang lira beneficiary tem densema nisung masi kati Commission indang e-filing portal ajanga benoktetsū mesūra Secretary, Central Electricity Regulatory Commission, 6th, 7th & 8th Floor, Tower B, World Trade Centre, Naoroji Nagar, New Delhi-110029 (or other address where the office of the Commission is situated), dangi petitioner indang copy ka densema osang agūtsūba sūlen anogo 30 tsūngda corporate office indang agūja aliba address dangi zūlutetsū.

Place: Gurugram
Date: 28.01.2026
Sd/-
General Manager (Commercial)

POWER GRID CORPORATION OF INDIA LTD

(A Government of India Enterprise)
Reg. Office : B-9, Qutab Institutional Area, Katwaria Sarai, New Delhi-110 016.
Corp. Office : "Saudamini", Plot No. 2, Sector-29, Gurugram-122001, (Haryana) Tel. : 0124-2571700-719
www.powergrid.in, CIN : L40101DL1989GOI038121

A Maharatna PSU



Indian Overseas Bank, Dimapur Branch

1st Floor, 62B Indraprem, Marwari Patti,
Near Jain Temple, Dimapur, Nagaland- 797112,
Phone No. 8925953425, Email: iob3425@iob.in

Ki-o-jen aser alikimung meypa agiba osang [Rule 8(1)]

Indian Overseas Bank indang Authorised Officer ama Securitisation and Reconstruction of Financial Assets and Enforcement of Security Interest Act, 2002 aser Security Interest (Enforcement) Rules, 2002 kūbok section 13(12) aser rule 3 nung tashi agūja aliba dak ajemdaker **03.10.2025** (osang kakē adokba anogo **19.11.2025** Eastern Mirror & Tir Yimiyim nung adokba) **nū sen apur/mortgagors/guarantors Ms. Livika V Zhimomi, H. No. 25, New Colony, Purana Bazar, Dimapur, Nagaland- 797116** (hereinafter referred as "borrowers") nem **03.10.2025** nū tashi nung notice nung shisema aliba sen **38,64,113.00** den contractual rates aser rests, charges amalana nung tetemlok densema osang agizūka sūlen anogo 60 tsūngda sentsūh aotsū takhangba ka agūtsūogo.

- (1) Sen apuri tapuba sen meypa magūtsūtet asūnung sen apur aser nūburtem dang Act kūbok Section 13(4) aser Rule 8 nung tashi agūja aliba amshia **kūm meyi ana metsūr trok kūm January 21 nū** tekūboklen shisema aliba ki-o-jen aser ali kimung agiba metetdaksūr.
- (2) Sen apur dang mejeta aser nūburtem dang item ki-o-jen aser ali kimung dak sendakba nung kecha tsūtatep masūtsū tekūmdaktsū metetdaksūr, ajita mesūra **03.10.2025** tashi nung tetemlok ajak meyokteper Indian Overseas Bank nem sen **38,64,113.00** agūtsūtsūsa akūmtsū. Ki-o-jen agibanū tashi nung sentong aser tetemlok ajak senteper sen **45,81,154.33** agūtsūtsū liasū.
- (3) Sen apur dang Act nung Section 13 kūbok Sub-section (8) dak ajemdaker atakzūkja aliba mapang tsūngda ki-o-jen aser ali kimung meypa agitsū metetdaksūogo.

KI-O-JEN TERASA:

Purana Bazar, New Colony, Near Law Officers Quarters, Dimapur, Nagaland- 797116 kūbok Patta No.1801, Dag No.1330/2468, Door No. 455, Mouza No. 3 agi ayimjema aliba 1 Katha 11 Lecha ali aser ki ka densema lir, koba **Ms. Livika V Zhimomi** tenūng nung lir.

Aartsū: North: T.Vikheho Zhimo, **East:** T.Vikheho Zhimo / Road, **South:** Ghoishhe Yephthomi, **West:** Ms. Livika V. Zhimomi.

CHERSAI ID- 400080340038

Date: 21.01.2026
Place: Dimapur

Sd/-
Authorized Officer, Indian Overseas Bank



TIR YIMYIM YIMOBILEM (EDITRIAL)

DIMAPUR WEDNESDAY, JANUARY (AENJETI) 28, 2026

Kechi menensa nangzüksü ?

Mokokchung Town Ao Baptist Churches Mission telungjemi Ao kin Tsüngrem dang temenen nangzüka lumia sarasademba sentong ka taküm 2026 küm January 30 nungi 31 tashi anogo ana Mokokchung town nung sarasademba sentong ka agitsü ayongzükba ya Ao kin asoshi kanga nüngdak aser tongtibang sentong ka asütsü. Iba ama kin rangben asoshi tanela nung khuret bena sarasademtsü ayongzüksü nüngdaka Tsüngrem tenzükertem den jembiba tetezüji, Tsüngremi asenok Ao kin mesamadaktsünüi meimer aser taochi sayur ta asenoki angatetdi. Atangji, Tsüngrem tsüngdang tai nangzüksübaji kari ayong atatsüba masü mesüra khen nangzükerji ojang ta masü saka asenok ya alima nung alir asünungji anogo shia asen ajung asaa bilemdang, ali rongsen penbudang, takok ngunü dang aser asen ain apong aser shi azü mazüoktet dang Tsüngrem anema meteta aser memeteti tai menapet menar. Iba jagiang, David-ia Tenüngsang Ken 51 nung, “ Oh Tsüngrem, ni na anema, na anema dang temenen menaogo, anungji nü matsüngdang ni metena jembitsüsa kü temeten kecha melika,” ta pai menaba taitem asoshi taochi aser tadok meshia sarasademba asenoki angur. Iba sarasadem indangji kodang asenoki bilemdangdir, atangji, tanü asenok sarasademjia kasa David sarasademji asütsü nüngdaker. Ajisüaka, asenoki asen kija kibong, asen yimer aser asen kin aser nübortem asoshi Tsüngrem dang taidok meshia sarasadem dang, jet ta asenoki menaba tai temenentem masü saka asen akhi lepteptsüngtep mapang asen tetsü teboutemi menaba tai temenenten indangang nangzüksüla ta temulungjangi arur. Iba jagi asenoki menaba taitembo asenoki mangur aser tanü asenoki ajuruba tamakok, maksü aser timtem ajak ya akhi tsüraburtemi menaba tai ajanga ajurur ama asenoki bilemer. Iba jagi asen tsüraburtembo taidok angu saka asenokbo mangu ta ser Tsüngrema mali ama tanü asenok liteper südi. Ibaji kodang bilemdangdir, asenokbo tamasa Tsüngrem dang masü saka akhi aser tetsü teboutem dang tama tadok meshitsüla akümer. Atangji, akhi tejen putu nung Anitet 34:7 nung Tsüngremi Mosa dang, “ tsürabur tai atema chirnur aser semchirseknur dak putu asemububa aser pezübuba tashi mang ayanger,” ta shia aliba ama tanüa kasaji Tsüngremi asenok dak inyak nungbo asenok ajak samar lila. Ajisüaka, Tsüngrem taochi agi iba atakatem temerenshiji agentsüba asenoki Tazüngkunem 24:16, Yerimia 31:29 aser Ezekiel 18:2 nung, joko tsüraburtemi tasen achiba ajanga tanurtem tebu memejemtsü aser tsüraburtem tai yong chirnurtem masütsü saka nisung shia pei tai agi pei asütsü ta shia angutsü. Aji oda, tanü asenok ya tsüraburtem temoatsü aser maongka nung asenok alir ser nung, asenoki parnokibener aruba temoatsü senmangtemji masü saka parnokibener temenentem agi asenok kangshir amaisa bilemer. Iba tangatetbaji asenok kolok aser mulungjang nungi odaktsütsüla aser asenokbo aseni menaba taitem bushia nangzüksüla. Koda, tang asenok tsürabur kümer taküm alirtem yimsüsüba aser ketdangsüba menden tajung nung tulur aser takar kümer amendang, Yisu osang tajung indang sayutsüngirtem kin nungi adokbo memesük asen lima nung dang masü saka bendang ter sema nüktapangta senzüba to ? Koda, nübortem yaritsü yimten tashi agütsü nung iba tashiji amshia nübortem meyong rakzüka agiba ya ? Koda, takok ngunü dang ochimashi aser tashiyim mapa inyakba ya ? Koda, Tsüngrem tenzükba wadang nung nokdaka yur auyaba, nüktapangtaba aser ochimashiba ya ? Koda, tai adoktsü melen merenshitsüang bilemba ya ? Atangji, asenok tang taküm alirtemi Tsüngrem anema tai menaba kodaser züngdangtettsü ? Ajisüaka, asenoki dang asen temenentemji nangzüka tadok meshira, Tsüngremibo adoktsü. Ajisüaka, asen Ao kin asoshi ano tajidaktsü kaji, asenoki tadok nangzüker anosa metetsümonga Tsüngrem anema inyakra koda ? Atangji, tang asenoki Tsüngrem dang tadok nangzükba yabo asenok alima nung yimten tashi ka angutsü asoshi masü aser ali rongsen nung takar akümtsü asoshia masü, tangar madak tokolak akümtsü asoshia masü saka Tsüngrem sentsüwangshidaktsütsü asoshi asütsüla.

OLEMSABANG

MERAJEMBA TEKUREM

~ L.Temjenwapang

(Iba Yimjangjem otsü ya Tir Yimyim aser Bookipedia nati ayongba toktep nung shilem agirtem)

(Yashi adok nungi...)

Ayongpangtsü tu joko ayonglang nungibo meyiba matutetsüji ta sasa ali-a tu ya. Tzükongla; Kechibaka, ayonglang nungi tzüsü atuba ajanga anüng nungi tzünglu arua tanaben ayongbangtsüji ayim tenzükertem atu ya. (yamaji tena kanga menütep) Wangshiba; Tanübo otsü ken atongti ta sür pai yakta longbak ana bushia ala aser yangji tena ka ka nung amen, idangji lai ashi, ni temang tera majungba ajanga itaka shi nüngdak mejajatet. Wangshi; Haoja nia kanga rata liogo tzükonglar, ya na kechi nüngdak sa jajar? Ni tsümalen nungi tilateri belena shishilembar aja. Kanga junger, süra ni langka shidi ni? ta sür Wangshiba tejak ajak merema asükshijang ajak tangteta aküm aser züngzünga mementet. Lai aji ngua'na scü alur masü südi ya? Wangshiba: Masüago (terok ajak konger tanemi ashi) Nai melungra ana lidi ni?

Tzükonglar; Tsürabur dang asüngdangteplaba, ta sür senshi. Joko tsürabur anatsülen nungi mulungtepa Wangshiba aser Tzükongla na sati kuli tajung agia kibong aküm. Kobi meli tetsü o tebu naprong süadok. Wangshiba aser Tzükongla na jala tajung kati sosemer küm ishika pelatepa jangratema lia aru, saka Wangshiba asoshi terongjen tulutibaji pa kibong kümer mapang tatsüka tsüngta nung kanga dang meimtepa aliba tetsü aser tebu naprong süadokba asoshi pa dangi timtem shisabulu aru dang khuret lemsatepa asüngdangya shisatsü angudak maka aküm. Aser ano külen reprangdangra, kinüngtsü bendangtsür anungji timtem tushi nung yariteptsü anük apang tajung mali.

Akidangbo tsürabura kibong tajung aser tejungnü tesüngmangtsü awashia meteta lia aru, anungji yimer ajaki kanga aküm agüja timtem nunga yimer ajaki yakta dang ajiteta shisatsü nung süshia akialu maparen balala ajak nung yaritepa aru. Saka tanübo Tzükongla tu onsara shira agi Wangshibai yimtsür yimer tem den jongteptsü lenmang mesademi aküm. Anungji tanem- tanemi yimer ajaki sendoktsüsa aküm. Pa mapai ao dang mezüng Tzükongla jembishinü nung kanga junga pua, anungji tanübo joko pa jembinüba mejembitet ano pai inyaknüba meinyakteter, oda tanübo Tzükongla o agi pa taküm kanga junga alendaktsü aser ola madokteti iba khuret jagi alima nung pa kija alir ama kümogo. Wangshiba asoshi ibaji akümlir molumi liasü. Kechiba süra pa lanuwa nungi temeim, tejungnü shisatsüji pa dak liasü. Ken kenbo maremteti kiyong kidanger timtemer kar den danga yaritepra oda kinüngtsü Tzükongla jagi mapa yariteper mechiyongtsütsü masüji na asoshi taonungbo chibu nung jang mesüoktsüa tasa ashi. Iba ama maparen nungi, mapang shia kidang kirong dena rongrongtep. Idangji yimertem jagi Wangshibar kibongji reprangangjo bendangtsür agia yur kidang yamai rongrongteper ta merametsüa jembitepaji pa narongi angashir aser idangji taak-a aaker ano temulung kanga shiranga bilembaji, ni kütsü o kübo na den alidangbo parnok ajak ya ozüi meyaridangba kibong ka danga mali ser nung, oja o oba na mali yong kala ozü tanü yamai timtem dangbo o tajung ka agi kü mulung süngzüksütsür-a malia naya ta kanga temulung shiranga tetsü o tebu par asem meimtepa aliba tu bilemteta memeteti pa tenük nungi nüktzü alu. Idangji pa mulungjangi akidang pa lanuwa tebu sayuba o ka bilemtet. Koba mapang aseni shir yaritsüla itemburji nübu rongsen kechi agi yaritsü tim iba jagi yaritsüji kodanga tamadok ta tebu ashiba o tu bilemtet. Saka tanü pa taküm aser par kibongi ibala mapaji inyaktsü kangasa tamakoktsü liasü, idangji ano, pa mulung zürepaji taliang aküm aser tejashi marem, mena aliba makümüji peretdaksü idangji tzüshirong nung tzüshi pezü, pongu ka jakrepa aon.

Tia maka mapang tatsüka lir külen par nokinketer yimti nisung tashi agibo lao daktsütsüji tamakoktsü liasüba tu, par yimli nung ajungbena aya wara ka aru aser aji kanga dang tesüngmangtsü ka liasü. Yimti nüburtemi küm tepiyong tsünü süngpongtsü yokba aser alu ajak tu ajungbena dang Süngko (grasshopper) tapu ka poktet aser aonsotsü aser motong ajak chimatsü. Küm tepiyong inyakba ajaktu amajok kümer alu ajunga tazüng aküm. Joko yimer ajaktu chiyongtsü agi anünger kibong ajunga nung makamait agi timtemteper, idangji Wangshibar kibong nungtu petsa perong olura adoker kechiba süra Tzükongla dak temeim mali, ano awashi memetet, tila maküm, ngasangadem, timtem marem, anungji iba ama makamait tesem nung ni melitetsü ta sür tanur jala kajia ner chirji nai mesüang ta shir la sasa kidang nungi ayazüka ao. Idangji Wangshiba yamai masür ta noktangdang, saka, kodasür Tzükongla pangji akoktsü, pa asoshi ibaji tamakoktsü liasü aser laji odang taoba aküm.

Joko Wangshiba tsürabur anaprong süadoker ali nung, ano kinüngtsüa toktsür oadok, anungji pa asoshi shisabulu khuret agi amang o sangwa na mepentangtet ka kümer, teyimla kecha makai par atepzüng nung temeimtsü jala ji azüiter jeba alidang, pai kanga sa yaria aliba, Rongjenba tu aru. Hai Temba, na kechiba yamai shisabulur? Ya alima atu, yipru sülenang tesünep arurago. Ni ne tia ajak meteta lir. Na kecha shisatebulu, nai ajak tongjema meteta lir. Saka na-a meimchirji tu naia ka merajema ya. Tetsür jembishinü osü tajunga ta sür kibalembu nung nai tasü ait. Iba jagi tanü ya ajurur, saka asen yimtsür tajung aika ne ki arunüseta lir tu ta temulung senzükja pa temba Rongjenba teyari ajanga yimtsür mulung tok tajung ka agir pelatepa tetsü o tebu na koma meimtepa aru yamaji lia ao.

Kenü anogo Ronjenba kisemi arur, Ohi Temba, Wangshiba; Lirgo, arung na aruba ya shitaka ya (tena sensaksem tenzük) Wangshiba; Temba, Ni kü taküm nung ajak abensar meteta rajema tongjema lir ama bilem saka oda merajem metongjem aika lir asüa nuh. Tanü kü tsürabur meliaka nai ni shisatsü nung yamai yariaba ya kanga pelar, ta shia pa tashi maitem sasaseta lemsatep.

"Asenok taküm nung aika tonga meteta rajema alitsü akok, saka merajembaji temoatsü ka amai, mesüra tepelatsü, konang nüngsang ka amai arudang saksalema shisaka alitsü nüngdaker".

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Sri Lanka Catholic putir merenshiba bushisüngdangtsü akhanger

Colombo, Aenjeti/January 27 (Agencies): Catholic putir ka Holy Mass nungi meyipa shilangba mapang lenmang nung police temi merenshiba bushisüngdangtsü Sri Lanka nung aluba Catholic arogo temi akhanger.

Archdiocese of Colombo nungi Father Milan Priyadarshana ya January 24, 2026 nikongdang merenshia amshi. Police pezüi pa dang o tamajung ashi, tetsüng agi metsü aser tsüngsem aser helmets agi atep, ta Catholic Church of Sri Lanka indang national director of mass communication Father Jude Krishantha-i ashi.

Priyadarshana temang nung zübu liasü aser linük yimtiba Colombo nungi kilometer 35 shi pilar Negombo yimti nung aliba mozüki ka nung temang anepalur.

Krishantha-i mozükidang Priyadarshana semdanga liasü aser pa cassock sema aliba ajanga police temi pa ya putir ka lir ta ajitet ta ashi. Parnoki pa dang, 'Nenok amala nisung yagi cassocks aser robes amshia linük raksatsür ta ashi, ta pai osangbener dang January 25 nü ashi.

Priyadarshana-i sema aliba

cassock nungya tang tashi tsüngsem tarak lir aser iba timtem ajuruba tenük kuli alirtemi okadak kuli agütsütsü mulunga lir ta ashi, ta pai ashi.

"Onoki ketdangsür nem aibelener bushisüngdanga temerenshi agütsüdaksüner," ta Krishantha-i UCA News dang ashi.

Police temi putir merenshiba sülen lendong ka atalokba indang asüngdangya asü aser gari mashi aniba atema senchi achitsü merang, ta ashi.

Ajisüaka Priyadarshana-i gari lendong kecha nunga pa dena mali ta ashiba sülen police temi pa indang driver's license repranger yok, ta Krishantha-i ashi.

Archdiocese of Colombo indang auxiliary bishop, Maxwell Silva den putirtem, activists aser ozüng yanglurtemi mozü kidang yirur alisang putir ya semdanga liasü.

Minister, Science and Technology, Krishantha Abeysena-ia putir ya semdang aser police temi maksütsü aser temulung agi magizüktettsü mapa inyakra atema aitsü.

"Putir ya ano anogo ishika mozüki nung amungtsü nüngdaker," ta pai ashi.

Catholic putir aser bishops tem densema Sri Lanka nung tamangba yimsü balala lenirtem akumtsüboa mamshiba yimya tali akumba atema Abeysena-i kanga sasaba lemsatapa liasü.

Küm ishika yimten yimsüsür temi tamangba yimsü tsütsü lenirtem indang akumtsüboa mejembiba ajanga yimya tamajung sayur, ta social activist Nalin Mallawarchchi-i ashi.

"Linük nung tensa azüoktsü nunglokja aliba police temi yimjak nung tamangba yimsü lenir dak züka merenshiba ya maksü ulura lir," tap ai ashi.

Catholic nunger opposition lenir Kavinda Jayawardena-ia Priyadarshana ya Catholic putir ka ta jangjaka merenshi ta ashi.

"Putir asoshi ochi obendang agütsütsü sorkar mapa lir," ta pai ashi.

Sri Lanka nung Catholic putir tem dak züka merenshiba aser tepsetba otsü lir.

2001 küm Father Alfred Bernard Costa ya Colombo archdiocese nung par mission kidang tepset aser Father Srilal Amarathunga ya 1990 nung tepseta liasü.

Parnok tepsetba atema nisung shinga memerenshi.

ANO GO ABEN TSÜNGREM DEN

Tematiba taküm jenjang

Saka ni kü alizüng tongtettsü asoshi, aser Tsüngrem taochi osangtajung indang kuli agütsütsü ni Kibuba Yisu nungi tenzüksü agizükba renemtsü asoshi inyak, ni kü takümüji kü sasa senti ta kecha sükshia mali. - T. Mapa 20:24.

Tanü taküm jenjangji mesükshi-i chichiba putu ka lir. Meshisadangi parnok sasa lendong aketba lenmang shimer.

Mozü achir, pei sasa soseta asur aser iba yagi takum jenjangji sükshia mali ta sayur. Tangar takum asoshi kanga mesukshir. Taochi makai tepsetba ajaklen ataloker. Memeteti tepseta yutsüba yimti yimdong nung shitener.

Saka takümüji Tsüngrem teka nungi agutsüba sempet ka lir. Iba jenjangji Khrista nung taküm tasen akümba aser kotak nung Tsüngrem tsüngdang teti tatem makaba takum agi dang melentsü akok. Khristani takumji pelaa agizüker aser kümzüka ayur. Saka Pauli ashir, iba senti takumji asen mapa agi takar mekumdaktsüra kecha jenjang mali.

Tatem nung kecha makai atemer. Nisung shirnoki pei taküm jenjang mesukshir parnokji tamashi lir. Parnok dang Tsungrem temeim indang ashitsula aser Tsüngrem tsüngdangi anasa anir oa, parnokji Pa tsungdang senti lir ta angatetdaksutsula. Parnok dang Kalvary kangki indang sayua Khrista dangi anir aoba ajanga Tsüngrem temeim jungkai adoktsu aser iba jagi taküm jenjangji uludaktsütsu. Khristai agutsüba mapa abensa inyakra takümüji tematiba jenjang nung alir.

Cyber impersonation atema Indian bishop-i police dang mera agitsü ajungshir



Thrissur, Aenjeti/January 27 (Agencies): Cybercriminals temi India nung Catholic bishops' forum tekolakba tenüng amshia senotsü bendenba aser putirtem aser nüburtem nungi tongtipang osangtem meshiba sülen pai police dang mera agitsü ashir.

Catholic Bishops' Conference of India (CBCI) indang tir Archbishop Andrews Thazhath of Trichur-i Kerala state kübok Thrissur City Police nem January 23, 2026 nü ken o ka agütsüba nung, ashikülak mapa inyaksü atema pa tenüng, designation aser noksa tem amshi ta tai tongloksü.

Kerala nung aliba Trichur Archdiocese tekolakba Thazhath-i ashiba agi, nisung kari pa indang noksa amshia online nung taila profiles yanglua putirtem, arogo, tamanger, yimten yimsüsür aser nüburtem den tongtepratep asü.

Iba ama mapa tamajung

inyaker temi Thazhath ama mesüra CBCI nung lenir ama tiazü kuli agütsü, ta ken o agütsüba nung shia liasü.

"Item calls aser messages tebilemba aser yimya balala lir. Nisung kar dang parnok mobile phones nung aruba OTP (One Time Password) lemsatsü ashi. Kar dang CBCI dak sendakba ken o jembitsü atema video conference links nung adentsü jaok," ta Thazhath-i ashi.

Nisung kar dangbo CBCI tenüng nung senotsü teyari meshiba lir ta pai ashi.

Kü tenüng nung mesüra bishop tentet tenüng nung iba ama calls, messages, video conference links mesüra senotsü meshitsü temelaba khenyongi magütsü, ta archbishop-i jangja-jangja ashi.

"Iba ama ashikülak inyakyim yagi nüburtem mangmangdaktsür aser tenüng menüksür aser parnoki tongtepratepba nisung temi

temulung melemteti akumer aser parnok lendong-timtem ajurutsüsa tensa tia nung yutsür," ta pai ashi.

Thazhath-i kuli asoshi ashikülaka call aser message asüba screenshots inoktsü aser police dang kanga junga bushisüngdanga tarutsü nung pa tenüng mashi lenmang nung mamshitsüsa tapet temerenshi agütsütsü ajungshia liasü.

"Ibai tebilemtsü kanga tulu lir aser iba mapa inyaker jangjatsü asoshi police temi kanga junga bushisüngdangtsü nüngdaker," ta CBCI odongtar Father Robinson Rodrigues-ia ashi.

Tang tashibo senotsü akoksaba osang mali, saka nüburtemi kanga junga jangjarang calls, messages mesüra OTPs meshiba nung langzütsüla, ta Rodrigues-i January 26, 2026 nü ashi.

Küm ishika India nung cybercrime tatalokba kanga sashia kumogo. 2022 küm cybersecurity tatalokba 1.029 liasü aser 2024 küm 2.268 million liasü ta federal government data ajanga ashir.

Küm shia sen US\$1 million dak tema auyar, ta Indian Cyber Crime Coordination Centre-i asadangteta lir. 2026 tashi küm trok tsüngta nüburtemi sen \$6 billion dak tema akoksaogo, ta report ajanga ashir.

AO KIN

Tsüngrem Dang Temenen Nangzükba

Sarasadem Sentong

January 30 & 31, 2026

Sentong 1

January 30, 2026 / 05:00 PM / MTBA Tenla Ki

Kenten anitsü	: MTBA Choir ketdangsürtem. I/c. Mr.Panger, Asstt.Pastor
1. Menden	: Rev. Dr. Bendang Longkümer, Pastor
2. Sarasadem ayongba nükjidong	: Rev. Ponen Longchar, Pastor
3. Tayongzükba O	: a. Rev. Tamsü Jamir, Executive Secretary, ABAM b. Mr. Marsanen Imsong, Tir, Ao Senden
4. Temeja ken	: MCBA Choir
5. Tsüngrem O	: Rev. Kari Longchar

Sentong 2

January 31, 2026 / 06:00 AM – 12:00 Noon

Lumia Sarasademba Mapang
Tesem: Imkongmeren Sports Complex

TEMETETTSÜ:

1. Iba sentong nung asen Aor Aotsür ajak arua atentsü mepishir.

2. Iba sentong asoshi ajaki sarasadema atadi.
Sentong ayonger : Mokokchung Town Ao Baptist Churches Mission

AO OSHI ANGAZÜKDAK:**TANÜ ANGAZÜKTSÜBA OJANG****Tuyu**

(v) temeyong agi sayu (point out with finger)

* Tesayuri tanurtem dang temeyong agi tuyua par ki sayu.

Twangshi

(adv) sentsü kanga aitba, wangshiwangshia aliba (glorious, fame)

* Ylmten nung twangshi mapang nübortem meima yaritsüla.

OLONG PAITEP # 7397

1		2			3		4		5
				6		7			
8									
						9			
			10						
11									12
					13			14	
15									
16							17		

TIPLIN

- Nüji masü - (4)
- Techinütsüka - (6)
- Aketa shirangba - (5)
- Pi - (6)
- Amena - (5)
- Kinü - (5)
- Tanang masü - (5)
- Lenmang - (6)
- Nübo tedi - (5)
- Tuoshi - (6)
- Shiruru apuba temenatsü - (4)

LANGTSÜNGLEN

- Jila tulu - (5)
- Sarasademdang tembang - (4)
- Tarutsü indang ashirtem - (6)
- Alia - (5)
- Mojing - (5)
- Tai inyakba metet - (5)
- Medemer chijiba - (6)
- Tatokba / Amadok - (5)
- Anüngdang masü - (5)
- Jabaso masü - (4)

OLONG PAITEP # 7396 TELANGZÜBA**TIPLIN :**

- Tesangra, 5. Mungo, 7. Kisen,
- Salem, 12. Semki, 14. Kilem,
- Kensü, 16. Sangpang.

LANGTSÜNGLEN :

- Temesen, 2. Raksa, 3. Aon,
- Aso, 6. Nile, 9. Alizüng,
- Omen, 11. Lemta, 13. Ola,
- Kin.

NAI-A YA METETTER

Cancer nungi kümzükertemi artificial larynx devices amshia National Anthem atenba otsü tasen ka yanglutetogo. Iba ya Telangana kübok Basavatarakam Indo American Cancer Hospital and Research Institute nung atalok. Republic Day 2026 benjungmung nung arishi küm 24 aser 87 tsüngda cancer survivors 75 temai Linük Naklu ken atenba The World Book of Records, London-i agizüka alima otsü tasen kuli agütsüogo.

Iba mozü kidang taoba küm 10 tsüngda shiranger 500 tashi larynx surgeries agia liasü aser iba nungi parnok 200 kümzükogo. Parnok rongnung karbo Laryngectomy Club nung züngsem kümogo aser parnoki ajangshia arubatem lemsatepa cancer agi shirangertem ajungmesor.

'Living root bridge' anepalur Hally War nem Padma Shri agütsü

Shillong, January 27, 2026 (Agencies): Meghalaya kübok East Khasi Hills nungi Hally War nem Padma Shri 2026 agütsütsü shimtetogo.

Siej nunger Hally War-i pa taküm piyong 'living root bridges' anepalua aruba atema iba naroküm agütsütsü.

"Hally War ya asen senmang, inyaksangshi aser taküm libaliro atema ambassador chichiba ka lir" ta Chief Minister Conrad K Sangma-i pa nem tenüngsang agütsüogo.

Hally War arishi küm 10

asüandang nungi teka agi ataktüsü tenzüker aser pai süngdonglidong kanga meimer aser lokti asoshi inyaker ta Conrad-i ashi.

Hally War-i küm aika living root bridges anepalua arur. Iba apu ya rubber fig trees teratem ayongnutem madak stüidaksüba lir.

Republic Day tenüng nung Padma Awards 2026 metetdakja liasü. Linük nung art, literature, social work, public affairs aser science wadangtem nung mapa tajung inyakba ajiteta iba naroküm agütsür.

Taküm atema Assam aser

tanga Northeastern state tem nungi nisung 10 shimtetogo.

Assam nung Padma Shri 2026 angutsüpur nisung 6 shimtetogo. Parnok rongnung Haricharan Saikia (Art), Jogesh Deuri (Agriculture), Kabindra Purkayastha (Posthumous, Public Affairs), Nuruddin Ahmed (Art), aser Pokhila Lekthepe (Art) dena lir.

Padma Awards ya India nung civilian honours tematiba lir aser telemsa asem- Padma Vibhushan, Padma Bhushan aser Padma Shri nung agütsür.

KSU-i arrtsülen alirtem dang Bangladeshi nunger meyaritsü tuyur

Shillong, January 27, 2026 (Agencies): Khasi Students' Union (KSU)-i Meghalaya arrtsülen alirtem dang ozüng alema Bangladeshi nunger aitba nung meyariteptsü metetdaksüogo.

Ozüng alema arrtsü adena aitba maparen nung lisopur kari yaritepba osang angashia KSU-i iba tekümdangtsü osang metetdaksü.

"Arrtsülen ozüng alema inyakba melenshiogo, arrtsülen alir nisung kari Bangladeshi nunger ozüng alema India-i aruba nung yaritepba osang angazüker" ta KSU president Lambokstarwell Marngar-i ashi.

Iba tebilemtsü ya joko cross-border trade dang masü saka 'organised assistance' dena lir ta pai ashi.

"KSU-i unit ajak dang aser talisa arrtsülen alirtem dang kümküma alitsü aser ibala maparen nung tenük yoktsü tetuyuba agütsüogo. Nisung kari danga ozüng alema aruba nung yaritepba putetra tapet mapa inyaktüsü. Khasi nunger mesüra tangar süang onoki merenshitsü" ta Marngar-i ashi.

"Meghalaya state aser talisa Hynniewtrepp nung Khasi homeland telungi ozüng alema aruba noktangtsü onoki meranger saka ozüng alema

arutsü nung yaritepertem aitsür" ta paisa ashi.

West Jaintia Hills district nung police-i tawa inyakba sülen KSU-i iba tekümdangtsü metetdaksü.

January 20, 2026 nü police Dawki route nung gari aika sot aser Bangladeshi nunger 18 tashi apu.

Iba mapa nung Indian touts ana- Meban Dkhar aser Melari Rasmus na dena apu. Tena ya Lad Demthring nung alir aser tena den gari (ML04 D 4739) apu.

Parnok apuba ajanga bendangertemi Jowai aser temeket nung kodaser liyonga aruteter ta asüba tebilemtsütem adokogo.

Gauhati University-i R-Day den külemi 79 Foundation Day amung

Guwahati, January 27, 2026 (Agencies): Gauhati University nung 77 buba Republic Day den külemi 79 buba Foundation Day mungogo.

Gauhati University lapoker küm 80 jungnüa academic excellence, leadership aser service to society inyakba bilemteta benjung mungogo.

Republic Day nung Gauhati University-i Constitution of India ya legal document ka dang masü saka temeyoktep linüka ka alentepba living idea ka lir ta metetdaksü.

1917 küm Sivasagar nung visionary movement ka tenzüka ajanga 1948 nung Gauhati University amenoka liasü aser tanü iba reju ajanga region aser linük tenzüker ta Vice-Chancellor Prof. Nani Gopal Mahanta-i ashi.

"Iba Foundation Day nung ni University of Gauhati tenzüka



nungi mangdang ayurtem aser shilem agia arur ajak nem tetushi agütsür" ta Prof. Mahanta-isa ashi.

"Gauhati University ajanga NAAC A+ accreditation nguogo aser NIRF 2025 nung State Universities nung 9th-place nung lir. Iba ajanga reju ajungba kuli agütsür. Tetenzükenbo affiliated colleges 18 aser postgraduate departments 8 dang liasü saka

tanübo Assam ajungalen affiliated colleges 320 aser departments 45 kümogo" ta Vice-Chancellor-isa metetdaksü.

Gauhati University ajanga Arts, Science, Commerce, Law, aser Engineering programs agütsür ta paisa shisem.

Tanü sentong nung Vice Chancellor Prof. Mahanta-i Linük Wako aser Registrar-i University Flag sala.

Adiala Jail nung Imran Khan temang tamajungba akumer



Islamabad, Aenjeti/January 27 (Agencies): Pakistan indang taoba ato kilonser Imran Khan ya Adiala Jail nung aziingmeyakdak tesem ka nung yua lir aser pa temang kanga mejungi kumtar, ta osang ka ajanga ashi.

Khan ya iba tsüngden chiokdak December 2, 2025 nungi anogo 55 jungnüa kinunger mesüra okatsür shinga dena osangtsüsang magidaktsüi arur.

Osang ajanga ashiba agi, tang Khan ya tenük nung infection lir aser allergic reaction lir, koba Rawalpindi-Islamabad region

kanga takong aser temokong asüba yong pa temang tali tamajungba akumer.

Pakistan Institute of Medical Sciences (PIMS) nungi medical team kati pa temang tendangba sülen iba infection ya Central Retinal Vein Occlusion (CRVO) asütsü akok ta ashir, koba tekeraba nung anepalu mesüra tenük agi kecha mongui akumtsü.

PIMS nungi medical delegation kati Khan ya Adiala Jail nung January 24, 2026 nü semdang aser pa temang tendanga liasü.

Medical ketdangsür temi,

taoba ato kilonser ya tenük kanga junga repranga tepuokdak aliba facility dang nungi tajungba nung specialized treatment agitsü nüngdaker, ta ashi. Doctor temi yangji akok tashi anepalu, saka temang ajunga tendanga iba sülen anepalutsü tekeraba nung nüngdaker. Ita shia temang tendangba ya January 31 nü lir ta osang ajanga ashir.

Region nung kanga asük-asaba ajanga Imran Khan temang ya tamajungba akumer ta ashir. Tzüüsang majungba ajanga pa tenük infection aser allergy ya tamajungba akum ta ashir.

December ita tetenzüklen nungi pa iba tesem nung puoka ayuba sülen par kinunger aser okatsür tem den ajuruteptsü memelar aser iba yongji par Pakistan Tehreek-e-Insaf (PTI) aser kinunger temi kanga aitsür.

Talisa Khan teyi-i pa ajurudakjang ta kanga ajungshir aser pa temang tamajungba akumba aser aziingmeyaka yutsüba ajanga temulungjang aser tekolok nung timtem ajurutsü ta ashir.

Khan teyi-i osangbener tem den mapang balala nung jembidang, tenu temulung tulu ta ashi saka aziingmeyaka yutsüba ajanga pa temang aser tekolok nung timtem ajurutsü ta ashi.

Tang tashi Pakistan ketdangsür temi Khan temang mejungi aliba mesüra par kinunger aser party züngsem temi ahangba indang sangdong kecha agüja mali.

N.Korea-i tzüym leni missile tem khaketa yok

Seoul. Aenjeti/January 27 (Agencies): North Korea-i Mongolbarnü tzüym leni ballistic missile aika khaketa yokogo, koba short-range missile tem liasü, ta South Korea aser Japan na metetdaksü.

Washington aser Seoul na Pyongyang anema parnok indang defence nokdakyim melenshitsü atema sensaksemba mapang North-i item missile tem tendanga liasü.

South Korea indang Joint Chiefs of Staff-i ashiba agi, missile tem ya local mapang 3:50 p.m shi nung linük yimtiba Pyongyang anasa tesem ka nungi linük anütoklen tzüym leni khaketa yoka liasü.

Missile ya kilometer 350 (217 miles) shi yima or tzüym nung tsüka liasü, ta kasa sangdong ajangasa metetdaksü.

Kasa mapang nung Japan indang coast guard-isa sangdong balala ka ajanga ashiba agi, parnok North Korea-i khaketa yokba ballistic missile tem detect süteta liasü, koba minute ishika yima or tsük. Ato Kilonser Sanae Takaichi-i

ashiba agi, Missile tem yagi Japan dak mekongshi.

North Korea-i ita ishika tsüngda short-range missiles aser multiple-launch rocket tem aika tendanga arudar. Parnoki ashiba agi, item missile aser rocket tem ya linük indang tactical nuclear arsenal terenlok nung tongtibang shilem ka ama yangkludar, koba U.S. aser South Korea nati linük amokmerenba nungi kümzüka ayutsü atema lir.

2024 küm mutual defence pact ka yangluba kübok Ukraine den rara nung amshitsü atema Pyongyang-i Russia nem short-range ballistic missile tem agütsüba sülen North Korea indang missile tem ya koma asütsü ta tebilemba tali kümogo.

U.S. Defense Department ketdangsür tejen kati South Korea semdangba mapang North-i item missile tem tendangogo. U.S nunger lenir yagi linük ana tsüngda military alliance modernize asütsü asoshi sensaksema liasü. North Korea anema jenjang agiba nung Washington-i parnok shilem tajemba kümdaktsüner.

West Java anentsüh lendong nung sepai 23 asü



Jakarta, Aenjeti/January 27 (Agencies): Indonesia kübok West Java nung anentsüh agi anenbangba sepai 23 süogo, ta navy otongdar kati Mongolbarnü jangjatsüogo.

Anentsüh ya Bandung Barat tesem kübok Pasir Langu Honibar anepdang kongshia liasü. Hokolbarnü tzünglu kanga aruba sülen iba anentsüh ya alua laisü.

Iba yimtsüng ya province kübok tenem len Indonesia yimtiba Jakarta nungi km 100 (62.14 miles) shi pilar lir.

Indonesia-Papua New Guinea border patrols atema training agiba mapang Marines 23 ya anentsüh agi anenbanga liasü, ta Navy otongdar First Admiral Tunggul-i ashi.

"Tsüüsang kanga majungba aser tzünglu kanga sashia aruba sülen iba lendong ataloka training agiba tesem ali agi anenbanga liasü," ta Tunggul-i ashi.

Mongolbarnü tashi nung iba anentsüh lendong nung asürtem ya nisung 17 aliba nungi 20 jungogo aser nisung 42 maneni

samar bushidar, ta Indonesia indang disaster mitigation agency otongdar Abdul Muhari-i ashi.

Agency-i sangdongba asürtem rongnung sepaitem ya densema ali mali aji mejangja.

Tekümsüker, military aser police personnel 800 den excavator teku yoka samar alirtem maneni busihdar

Muhari-i ashiba agi, anentsüh agi konshir aliba yimtsüng nung alir parnok 685 local sorkar kitemi aninogo.

Java asetkong nung tsünglu kanga sashia aruba mapang iba anentsüh lendong atalokogo. Taoba hopta Jakarta aser West Java aser Central Java nung yimti kar densema Indonesia nung tesem aika tzümetsüng agi metsünga liasü.

Ita ana tejakdang yipru tesashi ka agi Sumatra asetkong kongshia nisung 1,200 tepsetba den kiojen aika raksaja nisung million ka dak tema pei talidak ki toktsür jenshia aoba sülen tang anentsüh lendong ya atalokogo.

OFFICE OF THE

CHUNGZIA STUDENTS' UNION

Hq Chungtia, P.O. MOKOKCHUNG, NAGALAND-798601

Email ID: csuofficialsite@gmail.com

"For the Nation"

PELABA SANGDONGER

Ao Kaketshir Mungdang (AKM) 70 Buba inti mungdang senden Chungtia yimti nung Jan 13th - 15th 2026 tashi amungba sentong takok ngua mungtettsüsa teyari agütsüba aser shilem tajung asoshi item tongtipang nisungtem aser lokti balala ajak dang Chungtia Students' Union-i kanga pelaba sangdonger.

1. Dr. Neiphu Rio, Hon'ble Chief Minister, Government of Nagaland

2. Wb. S. Supongmeren Jamir, Hon'ble MP, Lok Sabha, Govt. of India

3. Shri. Metsubo Jamir, Hon'ble Minister, Rural Development & SIRD, Govt. of Nagaland

4. Shri. Temjen Imna Along Longkumer, Hon'ble Minister, Tourism & Higher Education, Govt. of Nagaland

5. Shri. Sharingain Longkumer, Speaker, NLA, Govt. of Nagaland

6. Shri. Imkongmar, MLA & Advisor, Minority Affairs, Sericulture, Govt. of Nagaland

7. Dr. A. Pangjung Jamir, MLA & Advisor, Fishery & Aquatic Resources, Govt. of Nagaland

8. Shri. Tongpang Ozukum, MLA & Advisor, Water Resources, Govt. of Nagaland

9. Shri. Temjenmenba, MLA & Advisor, Transport and Technical Education, Govt. of Nagaland

10. Wt. M. Imkongla Jamir, IAS, Resident Commissioner, Govt. of Karnataka, New Delhi

11. Deputy Commissioner Mokokchung

12. Superintendent of Police, Mokokchung

13. Shri. Sangpangchang, EAC Ongpangkong South

14. Mrs. Alila Imkong & Family

15. Aliba Village Council

16. Ao Students' Conference

17. AKM Planning Committee & Sub- Committees

18. Programme Participants

19. Mekuli Students' Union

20. Sponsors

21. Anukapang

22. Zunga aser lokti tentet balala

23. All the invitees and well-wishers

24. Delegates of all Unit

25. Mokokchung Press Club

Nenok sempet tajung, sarasadem nung nungitba, bendanga agüja mapa balala nung yaritepba aser rongsen tenla balala agütsüba ajanga iba sentong tajungtiba nung ayongzüka mungtetoko. Nenok temeim aser teyari asoshi tenüüsang agütsür.

(TSUKNUNGTEMSU LONGCHAR)

President

Chungtia Students' Union

(AOSENLA KICHU)

General Secretary

Chungtia Students' Union

A026: Svitolina aser Sabalenka na semifinal asayatsü

Aenjeti/January 27, 2026 (Agencies): Australian Open nung Mongolbarnü tetsür kija asaya nung Elina Svitolina-i mimlai lia America tsür third seed Coco Gauff koka semi-finals-i iogo aser Grand Slam title ka abentsü timla nung asayaba anasabaio.

Ukraine tsür 12th seed asayar yagi Rod Laver Arena nung minute 59 nung dang Gauff ya 6-1, 6-2 agi ayong ayonga koka liasü. Asaya nung Svitolina-i Gauff indang serve trokben break asü shibai first-serve points shilem 41 dang akok aser unforced errors 19 mena liasü.

Arishi küm 31 tain Svitolina asoshi iba asaya ya la indang career nung Grand Slam 14buba quarter-final liasü, saka tang mezügbuba Australian Open semi-finals tongtetogo. Lai 2018, 2019 aser 2025 küm Australian Open quarter-final tonga asayaogo. Auckland nung asayamung akokba sülen

Svitolina asaya 10buba khen danga tamakok mongui asayaogo aser la WTA top 10-ia aitsü.

"Maternity leave sülen meyipa arur asaya-a top 10-i aitsüji kü nükjiding liasü," ta Svitolina-i ashi.

La semifinal nung Aryna Sabalenka den asayatsü, shibai Jovic kokogo.

World number one Sabalenka aser America tsür arishi küm 18 tain asayar Iva Jovic na asaya ya Sabalenka-i 6-3, 6-0 agi koka liasü.

Belarus nungi top seed Sabalenka, shiba küm pezü tsünga Melbourne nung title asembuba abentsü merangdar, lai taküm iba asayamung nung set ka nung danga tamakok ngua mali.

Kasa asayamung tebur kija asaya nung Alexander Zverev-i America nung asayar Learner Tien 6-3, 6-7, 6-1, 7-6 agi koka semi-finals tongtetogo.

Iba asaya nung world No.3 asayar yagi aces 24 ao aser ashiba agi, küm ka tsünga pa

tang temang nung tashiba kecha meli-i asayadar. "Ni kanga anema lir aser court-i ia asayatetba atema kanga pelar," ta Zverev-i ashi.

Asaya nung Tien-ia Zverev kanga nongshia asayaogo aser tanabuba set nungbo pai tiebreak koka liasü, saka Zverev-i service kanga ajanga aoba den pa tajangshiba agi pai asaya koka liasü.

Zverev semifinal nung Carlos Alcaraz den asayatsü, shibai Australia nung asayar Alex de Minaur kokogo.

World No.1 Alcaraz-i Mongolbarnü Rod Laver Arena nung Alex de Minaur ya 7-5, 6-2, 6-1 agi koka tang mezügbuba Australian Open semi-final ka tongtetogo.

Alcaraz-i Grand Slam pezü asayaba nungi asembo kokogo, saka tang tashi Australian Open mekokteti lir, aser iba asayamung akoktsü atema pa meranga asayaba mapang ka nung pai semifinal tongtetogo.

Jos Buttler-i alizüing tasen tongtetogo



Aenjeti/January 27, 2026 (Agencies): England nung asayar tejen Jos Buttler-i Mongolbarnü pa indang career nung alizüing tasen ka tongteta pa ya linük nungi international asaya 400 nung asayaba tanabuba asayar kümogo.

Mongolbarnü Colombo kübok R. Premadasa Stadium nung Sri Lanka den tasembuba ODI asayaba mapang pai iba alizüing tasen tongteta liasü.

Arishi küm 35buba nung Buttler ya nüngtugu fast bowler James Anderson sülen tanabuba jenjang nung lir. Anderson ya linük tenüing nungi international asaya timba asayaba asayar lir. Pa asaya 401 nung asayaogo aser iba mapang wicket 991 agia liasü.

Buttler-i batting nung linük atema teyari tulu agüja arudar aser pai format ajak nung international run 12,291 yanglua lir, kong century 14 yangluba densema lir. Pa ya England nung white-ball asayartem

rongnung tajungtiba ka lir.

Test asaya nung Buttler-i asaya 57 nung run 2,907 yanglua lir aser pa indang average 31.94 lir. Test nung pai century ana aser half-century 18 yanglua lir. 50-over format nung pai asaya 198 nung run 5,515 yanglua lir, kong century 11 aser half-century 29 yangluba densema lir. T20Is nunga Buttler-i asaya 144 nung asayar lir. Iba mapang pai run 3,869 yangluogo, kong century ka aser half-century 28 yangluba densema lir.

Buttler ICC Men's T20 World Cup 2026 nunga asayatsü lir, koba India aser Sri Lanka na nung February 7 nü tenzüktü. Iba asayamung atema England-i squad sangdongogo. Team ya Harry Brook lenisüba nung asayatsü.

England team World Cup nung mezügbuba asaya Nepal den February 8 nü asayatsü aser iba asayamung nung Buttler-i maneni tongtibang shilem agitsü imlar.

PSG-i Barcelona nungi Dro Fernandez alizükogo



Aenjeti/January 27, 2026 (Agencies): Paris Saint-Germain-i Barcelona nungi lanur asayar Dro Fernandez alizükogo. Ajisüaka Barcelona tir Joan Laporta-ibo iba dak sendakba nung pa mepelaba lemsatepogo.

Laporta-i ashiba agi, Dro-i taoba mapang Barcelona den tenangzüktepba tasen ka yangluogo, saka pai club toktsür aotsüang shim.

"Dro Fernandez den tenangzüktepba yangluba Paris Saint-Germain-i pelashishia sangdonger," ta Ligue 1 champions PSG-i sangdong ka ajanga metetdaksü.

Arishi küm 18 tain Spain nung midfielder shiba number 27 asemtsü, pa iba club nungi 2030 tashi asayatsü atema tenangzüktepba yangluogo. Pa alizükba ya club indang sporting strategy den kanga puteper, koba sempet aketba lanur asayartem dak rangloker lir.

PSG-i pa sen kwi agi alizük iba indang osang tejangja magütsü, saka Spanish media sangdong balala ajanga ashiba agi, club-i Dro indang six-million-euro (\$7 million) release clause dang nungi timba agütsüogo, koba euro million 8.2 shi asütsü.

"Iba tatalokba ya

tezüdangtsüka," ta Dro-i club metoktsü tsünga Laporta-i Deobar aonung Catalunya Radio dang ashi.

"Iba ya taoksatsüka liasü, kechiyong onoki pa arishi küm 18 ajungba sülen jenjang agitsü asoshi tenangzüktepba yanglur liasü. Mimlai lia pa indang representative-i nangzüktepba ama minyaktetsü ta onok dang ashi," ta paisa shisem.

Dro, shiba Spain kübok Galicia tesem nungi lir, pa 2022 küm La Masia youth academy nung aden aser club tenüing nungi tiben asayaogo.

"Season pezü sülen tanü ni kü taküm nung tasaktiba telemtetba ka agitsüsa kümogo, koba club dang salem ashitsüba lir, koba küm ishika kü ki liasü," ta Dro-i Instagram nung zülutsü.

Dro-i club toktsütsü atema telemtetba agiba atema tezü adangba Barcelona coach Hansi Flick January ita tetenzüklen lemsatepogo.

"La Masia nungi lanur asayartem dang ni shinübaji asenok ya Barca lir, koba alima nung team tajungtiba rongnung ka lir," ta pai ashi.

"Nai Barca atema asayanera nü mulung noklang nung noklang bendanga agütsütsüla. Ni iba osang ya onok den tang alirtem aser tarutsü nung adentsüpur ajak nem agütsüner," ta Flick-i ashi.

Man Utd asayar Dorgu hopta ishika masayatetsü

Aenjeti/January 27, 2026 (Agencies): Manchester United nungi asayar Patrick Dorgu, Deobarnü Arsenal goal 3-2 agi akokba asaya nung hamstring yiruba sülen hopta ishika masayatetsüsa kümogo.

Arishi küm 21 tain shibai Arsenal den asaya nung United atema tanabuba goal idakja liasü, pa asaya tatemtsü lia ground nungi aloka tugu. Interim head coach Michael Carrick-i pa molatsü atuba dang südakja ta imlaba lemsatepa liasü.

Ajisüaka pa imlaba dang nungi tamajungba yiru aser source-i ashiba agi, Denmark nung international asayar ya temang maneni asadangdar, aser pa kobika masayatetsü tang tashi mejangjai lir.

Dorgu, shiba ita 12 tejakdang Italian club Lecce nungi wing-back ama United nung aden, pai Carrick kübok tabelen nungi attacking shilem kanga junga agia arudar aser pai Manchester City akokba asaya nunga goal idakja liasü.

March ita international break magi tsünga United pur Premier League asaya ti asayatsü lir. Break mapang Dorgu ya World Cup play-offs nung Denmark tenüing nungi asayatsü imlar.

Dorgu masayaba mapang Matheus Cunha-i tongtibang shilem agitsü imlar, shiba taoba asaya ana substitute ama asayaogo saka Arsenal den asayaba mapangbo pai goal ka idakja team takok dangi ania liasü.

BILEMDANGANG

"Tashishiba agi dang sünger alirtem pela malir."